



REPUBLIKA E SHQIPËRISË
KOMISIONERI PËR TË DREJTËN E INFORMIMIT DHE MBROJTJEN E TË
DHËNAVE PERSONALE

Nr. 1811/15 Prot.

Tiranë, më 04.01 2015

VENDIM

“Mbi pranimin e ankesës”

Nr. 03, datë 04/01 2015

Në mbështetje të nenit 23 të Kushtetutës së Republikës së Shqipërisë, ligjit nr. 119/2014 “Për të drejtën e informimit”, shkronjës a) të nenit 31/1 të ligjit nr. 9887 datë 10.03.2008 “Për mbrojtjen e të dhënave personale” i ndryshuar, Komisioneri për të Drejtën e Informimit dhe Mbrojtjen e të Dhënave Personale,;

V Ë R E N:

Nga shqyrtimi i ankesës së Znj. _____ nr. 1811/2prot., datë 15.12.2014, kundër autoritetit publik/Bashkia Kavajë, me objekt “Pajisjen me dokumentacionin e plotë që ndodhet pranë institucionit Bashkia Kavajë, në lidhje me periudhën e punësimit nga viti 2001-2011, konkretisht, vendimin e largimit nga puna, vërtetim page, kontratën e punës” rezulton se ajo është paraqitur brenda afatit ligjor, në përputhje me nenin 24/1/2/b të ligjit nr. 119/2014 “Për të drejtën e informimit”.

Nën këtë pretendim, ankuesja në cilësinë e kërkueses, ka kërkuar nga Bashkia Kavajë të pajiset me dokumentacionin e plotë që ndodhet pranë institucionit Bashkia Kavajë, në lidhje me periudhën e punësimit nga viti 2001-2011, konkretisht, vendimin e largimit nga puna, vërtetim page, kontratën e punës. Në tejkallim të afatit të parashikuar në ligjin nr. 119/2014 “Për të drejtën e informimit” nuk rezulton që ankuesja Znj. _____ të jetë pajisur me informacion. Ky veprim rezulton të jetë kryer në kundërshtim me nenin 15/4 të ligjit nr.119/2014 “Për të drejtën e informimit”, në të cilin shprehimisht thuhet se “...Në çdo rast, mostrajtimi i kërkesës për informim brenda afateve do të konsiderohet refuzim”.

Në ndjekje të procedurës për shqyrtimin administrativ të çështjes, Komisioneri bazuar në nenin 24/3 të ligjit nr.119/2014 “Për të drejtën e informimit” i ka kërkuar autoritetit publik/ Bashkisë Kavajë që deri në datë 29.12.2014 të depozitojnë parashtrimet me shkrim mbi ankesën e paraqitur nga _____. Nga shqyrtimi i parashtrimeve të dërguara nga Bashkia Kavajë me shkresën Nr.1921/1 datë 24.12.2014, rezulton të jenë dhënë shpjegime sipas të cilave evidentohet se ankueses _____ nuk i është kthyer përgjigje pasi një kopje e dosjes do t'i vihej në dispozicion në seancën gjyqësore të datës 05.12.2014. Konstatojmë që meqenëse data e seancës

gjyqësore ka qenë shumë ditë përpara datës së dërgimit të parashtrimeve, Bashkia Kavajë nuk shprehet se kopja e dosjes së kërkuar i është vënë në dispozicion ankueses . Nisur nga ky konstatim, është komunikuar me palën ankuese për të verifikuar faktet dhe nga pala ankuese është dërguar në rrugë elektronike emaili në të cilin shprehen se, procesi gjyqësor i shkallës së parë ka përfunduar në seancën gjyqësore të datës 05.12.2014 dhe nga Bashkia Kavajë nuk është vënë në dispozicion asnjë dokument i kërkuar.

Vlerësimi i dhënies së informacionit apo kufizimit të tij bëhet nga autoriteti publik në përputhje me nenin 17 të ligjit për të drejtën e informimit, por mos dhënia e përgjigjes mohon të drejtën e individit dhe është në kundërshtim të hapur me çdo parashikim ligjor dhe kur ajo bëhet e përsëritur rëndon pozitën e autoritetit publik.

Gjithashtu, në zbatim të Ligjit Nr. 9887, datë 10.03.2008 “Për mbrojtjen e të dhënave personale”, i ndryshuar sipas nenit 12 të tij, e drejta për akses është e drejtë e personit, subjekt i të dhënave personale.

Cënimi i të drejtës për informim dhe i të drejtës për akses, janë ndër të drejtat themelore më të rëndësishme për individin dhe shoqërinë në tërësi të parashikuara edhe në Kushtetutën e Republikës së Shqipërisë dhe garantimi i këtyre të drejtave të shkelura siç është edhe rasti në fjalë, monitorohet dhe sanksionohet administrativisht nga Komisioneri për të Drejtën e Informimit dhe Mbrojtjen e të Dhënave Personale në përputhje me ligjin nr.119/2014 “Për të drejtën e informimit” dhe ligjit nr.9887, datë 10.03.2008 “Për mbrojtjen e të dhënave personale” i ndryshuar.

Në aplikim të nenit 18/2/a të ligjit nr.119/2014 “Për të drejtën e informimit”, refuzimi i dhënies së informacionit është kundërvajtje administrative dhe si i tillë ky mosveprim nga ana e autoritetit, dënohet me gjobë nga 150.000 deri në 300.000 lekë. *Sanksioni administrativ në këtë rast i atribuohet koordinatorit për të drejtën e informimit*, në përputhje me nenin 19/3 të ligjit nr.119/2014 “Për të drejtën e informimit”.

Në kushtet kur implementimi i ligjit nr.119/2014 “Për të drejtën e informimit”, kërkon hartimin e projekt/programeve të transparencës nga autoritetet publike, brenda 6(gjashtë) muajve nga hyrja në fuqi e tij/nëntor 2014, Komisioneri vlerëson ndërmarrjen e masave më të shpejta dhe urdhërimin e zbatimit të detyrimeve ligjore ndaj individëve duke u rezervuar në ndëshkueshmëritë me gjobë vetëm në rastet e mos zbatimit të vendimit.

Në përfundim, në përsëritje të shkeljeve të konstatuara, më konkretisht për mos dhënie të informacionit ankueses Znj. drejtuar Bashkisë Kavajë, për mos paraqitje të parashtrimeve të autoritetit publik/Bashkia Kavajë, në përputhje me objektin e ankesës si dhe bazueshmërinë ligjore, Komisioneri vlerëson se, ankesa e Znj. është e bazuar në ligj.

PËR KËTO ARËSYE

Bazuar në nenet 24/3/4, 24/5/b/ç të ligjit nr. 119/2014 “Për të drejtën e informimit” dhe nenit 31/1 të ligjit nr. 9887, datë 10.03.2008 “Për mbrojtjen e të dhënave personale” i ndryshuar;

V E N D O S A

1. Pranimin e ankesës nr. 1811/2, datë 15.12.2014 të Znj.
2. Urdhërimin e autoritetit publik/Bashkisë Kavajë për të dhënë informacionin/dokumentacionin e kërkuar, ankueses në përputhje me objektin e ankesës dhe ligjin nr.119/2014 “Për të drejtën e informimit”, deri në datë 14.01.2015.

Kundër këtij vendimi palët kanë të drejtën e ankimit në Gjykatën Administrative kompetente, në përputhje me nenin 25 të ligjit për të drejtën e informimit.

Vendimi i njoftohet menjëherë palëve.

Ky vendim u dha sot në datë 07.01.2015.

